

Frohe Weihnachte

Om letzde Sunndaach war ich schunn so halb aus de Hausdier enaus als die Fraa merr noochgerufe hott: Awwer heit koon Krach omm Stommdisch, gell!

Ich dreh mich um unn frooch: Wie – koon Krach? Wie moonsden dess?

Sie hott die Händ gehowwe. Ei ich moon joo nor.

Ich habb de Kopp geschittelt. Krach? Mir? Ei ess iss doch bald Weihnachte, doo kriehn mir doch koon Krach.

Doo sächtse: Vorsjohr habbder grad vor Weihnachte Krach gehabt – waaßde nimmi, wie de Schorsch oofach vom Disch uffgestiehe unn fortgonge iss, ohne Adschee se saache?

Ich habb genickt, weil merrs aach widder oigefalle iss. Ah ja, awwer dess war vorsjohr. Dissjohr gibt's koon Krach, dess versprech ich derr.

Wie ich onn de Stommdisch kumme bin, warn de Karl unn de Schorsch schunn doo. Kaum hadd ich Gude gesacht, uff de runde Disch gekloppt unn mich hiegesetzt, hott de Schorsch aach schunn oogefonge: Honnes, ich habb mettem Karl schunn driwwer geredd – gell, dissjohr werdd nit so erumgestritte wie vorsjohr.

Aha, habb ich gedenkt, aachs Kättche hott dem Schorsch ins Gewisse geredd – so Fraue hawwe halt e besser Gedächtnis wie mir.

De Karl hott mich oogeguckt. Also heit nix von de nei Grawestrooß unn aach nix vom Boedergelände unn vom Innestadtzentrum.

Ich saach: Unn nix vom Fluchhafe unn de Londebohn unn von dene in Wissbade.

De Schorsch druff: Aach nix vom Benzin unn von de Rente. Unn erst recht nix vom Fortfahn iwver die Feierdaach.

Ja unn, habb ich die zwaa gefroocht, iwver was wolle merr dann heit babbele? Iwwern Adventskronz odder so?

De Schorsch hott genickt. Ja, so was ähnliches. Heit babbele merr iwver die Feierdaache unn was mir unn unser Kinner unn unser Enkel on dene Daache mache wolle.

Unn so hawwe merr uns verzählt, wie onn Heilichowend unn onn de Feierdaache gefeiert werdd, was die Fraa koche will, was die Enkel so ferr Wünsch hawwe unn dasses omm besde wär wenn merrn Geld schenke det, weil was die so ferr elektronisch Zeich ferrs Spiele unn ferrs Lerne bräuchde, doodefoo hädde mir Alde sowieso koo Ohnung. Dasse sich also kaafe solle wasse wolle, dann kennteses uns joo später emol vorführn.

Uff oomol iss unsern Werrt onn de Stommdisch kumme unn hott gefroocht: Saacht emol ihr drei, seid ihr all kronk? Merr heert eich iwverhaupt nit, ei dess bin ich joo garnit von eich gewehnt.

Doo hawwe merrm verzählt, dass merr uns heit vorgenumme hawwe, nix onnerst als iwver Weihnachte ze babbele unn dess wär joo werklich nix um laut ze werrn. Doo hott de Werrt nor de Kopp geschittelt, hott vor sich hiegemurmelt: „Friede, Freude, Eierkuche – wie longweilich!“ unn iss widder hinner soi Thek.

E bissi später hawwe merr bezahlt, sinn uffgestonne, hawwe uns die Händ gewwe unn frohe Weihnachte gewünscht, weil merr uns omm nächsde Sunndaach, so korz vor Heilichowend, nimmi treffe dun. Doch bevor merr gonge sinn habb ich noch was saache misse: Schorsch, Karl, ihr zwaa seid werklich super Kumpels. Glaabt merrs, wenss eich nit gewwe det, misst ich eich erfinne.

Eiern Honnes